



AMALIY HAMKORLIKNI KENGAYTIRISH VA SA’Y-HARAKATLARNI SAMARALI MUVOFIQLASHTIRISHGA ALOHIDA E’TIBOR QARATILDI

O‘zbekiston Respublikasi Prezidenti Shavkat Mirziyoyev 26-sentabr kuni

Xitoy Kommunistik partiyasi Markaziy qo‘mitasi Siyosiy byurosi a‘zosi, Siyosiy-yuridik komissiyasi kotibi Chen Vensin boshchiligidagi delegatsiyani qabul qildi.



Delegatsiya rahbari Chen Vensin davlatimiz rahbariga Xitoy Xalq Respublikasi Raisi Si Szinpinning salomi va eng ezgu tilaklarini yetkazdi.

O‘zbekiston bilan Xitoy o‘rtasidagi do‘stlik va barcha sharoitlarda strategik sheriklik munosabatlarini oliy darajada qabul qilingan qarorlar asosida rivojlantirish va mustahkamlash masalalari ko‘rib chiqildi.

Terrorizm, ekstremizm, transmilliy jinoyatchilik, kiberjinoyatchilik, narkotrafik kabi xavfsizlikka tahdid solayotgan an‘anaviy va yangi xatarlarga qarshi kurashda amaliy hamkorlikni kengaytirish va sa‘y-harakatlarni samarali muvofiqlashtirishga alohida e’tibor qaratildi.

Shu kunlarda bo‘lib o‘tgan Huquqni muhofaza qilish faoliyati va xavfsizlik sohasidagi O‘zbekiston — Xitoy hamkorlik mexanizmining birinchi yig‘ilishi natijalari yuqori baholandi.

Shuningdek, mintaqaviy kun tartibidagi dolzarb masalalar yuzasidan ham fikr almashildi.

O‘ZA

O‘zbekiston Respublikasi Prezidenti
Matbuot xizmati surati.

MA’RIFATLI VA IQTISODIY YUKSAK JAMIYAT BARPO ETISH G‘OYASI MUSTAHKAMLANMOQDA

Prezident Shavkat Mirziyoyev 26-sentabr kuni qurilish, ta’lim, turizm va sanoat sohalaridagi loyihalar taqdimoti bilan tanishdi.

Ma’lumki, joriy yil 3-aprel kuni Yangi Toshkent shahrida ilk inshootlar qurilishi boshlangandi. Davlatimiz rahbari bu ulkan loyiha ilm-fan va ma’naviyat maskanlaridan boshlanayotiganiga urg‘u berib, “Bular ma’rifatli jamiyat barpo etish g‘oyamizning asosi va namunasi bo‘ladi”, degan edi.

Shulardan biri — Alisher Navoiy nomidagi xalqaro ilmiy-tadqiqot markazi, Adabiyot muzeyi va Milliy maqom markazini o‘z ichiga olgan majmuadir. U jahonga mashhur “Zaha Hadid architects” kompaniyasi tomonidan loyihalashtirilgan. Bo‘ljak majmua o‘ziga xos dizayni va funksionalligi bilan diqqatga sazovor. Unda estetika va qulaylik mohirona birlashtirilib, atrof-muhit bilan uyg‘unlik hosil qiladi. Shu jihatlar bilan majmua kelgusida xalqaro turizm maskanlaridan biriga aylanadi.

Yangi Toshkent uchun yana bir salohiyatli go’sha — Chirchiq daryosi. Aholi va mehmonlarga zamonaviy sharoitlar yaratish maqsadida uning 6 kilometrga yaqin qismida dam olish hududi barpo etish mo‘ljallangan. Buning uchun qirg‘oqlar tartibga keltirilib, ko‘kalamzorlashtiriladi. Mehmonxona,

sog‘lomlashtirish va ko‘ngilochar maskanlar quriladi.

Keyingi yillarda O‘zbekistonning UNESCO bilan hamkorligi yanada mustahkamlanib bormoqda. Ushbu nufuzli tashkilot Bosh konferensiyasining 43-sessiyasi 2025-yilda Samarqand shahrida o‘tkazilishi belgilangan. O‘zbekiston Respublikasi Prezidentining shu yil 15-martdagi qaroriga muvofiq, bunga tayyorgarlik boshlab yuborilgan.

Taqdimotda shu borada amalga oshirilayotgan ishlar hamda rejalar to‘g‘risida axborot berildi. Xususan, Madaniyat va san’atni rivojlantirish jamg‘armasi, UNESCO ishlari bo‘yicha O‘zbekiston Respublikasi Milliy komissiyasi va boshqa tashkilotlar hamkorligida Samarqand shahridagi madaniy meros obyektlarini asrash, ular bo‘ylab sayohatlar va ko‘rgazmalar tashkil etish choralari ko‘rilmoqda. Mehmonxonalar va tadbirlar o‘tkaziladigan joylarda barcha sharoitlar yaratiladi. Sessiya ishtirokchilarining kelib ketishi, madaniy tadbirlar, transport va tibbiy xizmatlar muvofiqlashtirib boriladi.

Ijtimoiy sohadagi eng katta yo‘nalishlardan biri bu ta’lim. Aholisining ko‘pchiligi yosh

bo‘lgan mamlakatimizda uning barcha bosqichlari izchil rivojlantirilmoqda. Xususan, oliy ta’limda ham yangi maskanlar qurilib, sharoitlar yaxshilanmoqda.

Buxoro davlat universitetida 21 mingdan ziyod yoshlar o‘qiydi, 10 ta fakultet, 8 ta yotoqxona bor. Lekin binolar shaharning turli hududlarida tarqoq joylashgan bo‘lib, o‘qituvchi va talabalarga noqulayliklar tug‘dirmoqda.

Shu bois, Buxoro shahrining chekkasida universitet uchun yangi kampus qurish rejalashtirilmoqda. 43 gektarda loyihalashtirilayotgan majmuada barcha fakultetlar, ma’muriyat, yotoqxonalar, laboratoriyalar, kutubxona, stadion, sport zali va amfiteatr yaxlit joylashadi. Dars va amaliyot uchun zamonaviy sharoitlar yaratiladi. Yotoqxona o‘mi 3 mingtadan 6 mingtaga oshadi. Bo‘sh maydonlarga daraxtlar ekilib, bog‘ barpo etiladi.

Xiva shahri yurtimizning turizm manzillaridan biri. So‘nggi yillardagi bunyodkorlik ishlari natijasida uning salohiyati yanada oshdi. Bu yerga keluvchilarga qulaylik

yaratish maqsadida poyezd vokzali yonida yo‘l o‘tkazgich barpo etish mo‘ljallanmoqda. Loyihaga ko‘ra, 450 metrlik bu yo‘l transportlar qatnovini alohida tashkil etish imkonini beradi, vokzal va Ichan qal’a o‘rtasida piyodalar xavfsiz harakatlanadi.

Davlatimiz rahbari loyihalarni takomillashtirish, amaldagi ishlarning sifatini oshirish bo‘yicha ko‘rsatmalar berdi.

Taqdimotda Toshkent shahrida investitsiya dasturlarining bajarilishi haqida ham axborot berildi. Qayd etilgandek, joriy yilning o‘tgan davrida 2 milliard dollar qiymatidagi investitsiyalar o‘zlashtirilgan. 200 ga yaqin sanoat loyihalari foydalanishga topshirilib, 25 mingdan ziyod ish o‘rni yaratilgan. Jumladan, Yangiheyot tumanidagi texnoparkda 46 ta korxona tashkil etilmoqda.

Prezidentimiz yil yakunigacha mo‘ljallangan loyihalarni o‘z vaqtida ishga tushirish, energiya tejamkorlikka alohida ahamiyat qaratish zarurligini ta’kidladi.

O‘ZA

VOSIT VOHIDOV NOMIDAGI RESPUBLIKA IXTISOSLASHTIRILGAN XIRURGIYA MARKAZI JAMOASIGA

Qadrlı yurtdoshlar!

Avvalo, siz, azizlarni bugungi qutlug‘ sana — akademik Vosit Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazi tashkil etilganining 50 yilligi bilan chin qalbindan samimiy muborakbod etaman.

O‘zbekistonda jarrohlik bo‘yicha yetakchi va nufuzli muassasa hisoblangan ushbu Markaz ko‘p millatli ahil jamoasining fidokorona mehnati bilan mamlakatimiz sog‘liqni saqlash tizimida alohida o‘rin egallab kelayotganini barchamiz yaxshi bilamiz va yuksak qadrlaymiz.

Bugungi quvonchli ayyomda Markazni tashkil etish, uning tibbiy salohiyatini oshirishda beqiyos xizmatlar qilgan tabarruk insonlar, xususan, xalqaro miqyosda tan olingan atoqli olim Vosit Vohidovning xotirasini hurmat-ehtimom bilan yodga olamiz. O‘zbekiston tibbiyot ilmda yorqin iz qoldirgan ana shu fidoyi va jonkuyar insonning sa‘y-harakatlari bilan Markaz faoliyati samarali yo‘lga qo‘yilib, yangi diagnostika va davolash usullari klinik amaliyotga birinchilardan bo‘lib joriy etildi.

Mamlakatimizda sog‘liqni saqlash sohasida amalga oshirilayotgan islohotlar tufayli hozirgi kunda Markaz faoliyati yangi bosqichga ko‘tarilmoqda. Xususan, dunyoning yetakchi ilmiy markazlari bilan yaqin hamkorlikda ish olib borilmoqda. Tibbiy diagnostika va davolashning ilg‘or va samarali usullari keng tatbiq etilmoqda.

Ayniqsa, so‘nggi yillarda mazkur shifoxonada 200 dan ortiq yangi jarrohlik amaliyoti joriy etilib, qorin va ko‘krak sohasi hamda yurak-qon tomir kasalliklari bo‘yicha eng murakkab va yuqori texnologik operatsiyalar bajarilayotgani diqqatga sazovordir.

Bu haqda so‘z yuritganda, yurtimizda ilk bor shu maskanda yo‘lga qo‘yilgan tajriba asosida

1 ming 500 ta buyrak va jigar ko‘chirib o‘tkazish operatsiyasi, jumladan, tumanlarda 200 ta buyrak transplantatsiyasi amalga oshirilganini ta’kidlash lozim.

Hech shubhasiz, bunday natijalarga erishishda mamlakatimizda xirurgiya xizmatini isloh etish, hududlarda uning sifatini oshirish va ko‘lamini kengaytirish, Markaz va uning filiallari moddiy-texnik bazasi hamda kadrlar salohiyatini mustahkamlash borasidagi ishlar muhim omil bo‘lmoqda.

Eng asosiysi, og‘ir xastaliklardan aziyat chekayotgan qancha-qancha yurtdoshlarimiz ko‘p vaqt va mablag‘ evaziga xorijdagi klinikalarga borish azobidan qutulib, o‘zimizda davo topmoqda.

Fursatdan foydalanib, o‘z hayotini inson salomatligini saqlashdek g‘oyat olijanob ishga bag‘ishlagan Markazning butun jamoasiga — hurmatli professor va tadqiqotchilar, mohir jarroh va shifokorlar, jonkuyar hamshiralar, mutaxassis xodimlarga chin dildan minnatdorlik bildiraman.

Albatta, Markaz va uning mintaqaviy filiallari, tuman tibbiyot birlashmalarining xirurgiya bo‘limlarini modernizatsiya qilish, moddiy-texnik bazasini mustahkamlash, sizlarning mashaqqatli mehnatigingizni rag‘batlantirish kelgusida ham doimo e’tiborimiz markazida bo‘ladi.

Siz, azizlarni bugungi quvonchli ayyom bilan yana bir bor samimiy qutlab, barchangizga sihat-salomatlik, oilaviy baxt, sharaflari va mas’uliyatli faoliyatingizda ulkan zafarlarni tilayman.

Shavkat MIRZIYOYEV,
O‘zbekiston Respublikasi
Prezidenti

O‘zbekiston Respublikasi Prezidentining
F A R M O N I

AKADEMIK V.VOHIDOV NOMIDAGI RESPUBLIKA IXTISOSLASHTIRILGAN XIRURGIYA ILMIY-AMALIY TIBBIYOT MARKAZINING 50 YILLIGI MUNOSABATI BILAN BIR GURUH XODIMLARNI MUKOFOTLASH TO‘G‘RISIDA

Mamlakatimizda sog‘liqni saqlash tizimini xalqaro andozalar asosida rivojlantirish, aholi salomatligini ishonchli muhofaza qilish borasidagi ko‘p yillik samarali mehnati, ixtisoslashtirilgan tibbiy yordam ko‘rsatishni takomillashtirish, sohada zamonaviy davolash usullari va ilg‘or xorijiy tajribalarni keng joriy etish, xususan, murakkab jarrohlik operatsiyalarini muvaffaqiyatli amalga oshirish, jamiyatda sog‘lom turmush tarzini mustahkamlashga qo‘shgan munosib hisssasi, yuksak professional mahorat va malakaga ega bo‘lgan mutaxassislarni tayyorlashdagi katta xizmatlari hamda ijtimoiy hayotdagi faol ishtiroki uchun quyidagilar mukofotlansin:

Xaybullina Zarina Ruslanovna — Akademik V.Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazining klinik biokimyo va mikrobiologiya bo‘limi mudiri

Xaydarov Alisher Erkinovich — Akademik V.Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazining kardioanesteziologiya, kardioreanimatsiya va sun‘iy qon aylanish bo‘limi mudiri

Yarboev Rustam Raimkulovich — Akademik V.Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazining yurak ishemik kasalliklari va uning asoratlari xirurgiyasi bo‘limi mudiri, kardiojarrohi

“Do‘stlik” ordeni bilan

“O‘zbekiston Respublikasida
xizmat ko‘rsatgan
sog‘liqni saqlash xodimi” faxriy
unvoni bilan

Ismailov Saydimurad Ibragimovich — Akademik V.Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazi direktori

II darajali “Salomatlik”
ordeni bilan

Gulamov Olimjon Mirzaxitovich — Akademik V.Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazining torakoabdominal onkoxirurgiya bo‘limi mudiri

Madgaziye Oleg Raxmatovich — Farg‘ona viloyati ko‘p tarmoqli tibbiyot markazining torakoabdominal xirurgiya bo‘limi shifokori

O‘zbekiston Respublikasi
Prezidenti

Toshkent shahri,
2024-yil 26-sentabr

Djurayeva Nigora Muxsumovna — Akademik V.Vohidov nomidagi Respublika ixtisoslashtirilgan xirurgiya ilmiy-amaliy tibbiyot markazining magnit rezonans va kompyuter tomografiyasi bo‘limi mudiri

Kadirov Marat Jalgasovich — U.Xalmuratov nomidagi Qoraqalpog‘iston Respublikasi ko‘p tarmoqli tibbiyot markazining jarrohlik bo‘limi shifokori

SH. MIRZIYOYEV

MENING TANLOVIM — OBOD VATANIM!

27-OKTABR — OLIY MAJLIS
QONUNCHILIK PALATASI
VA MAHALLIY
KENGASHLAR DEPUTATLARI
SAYLOVI KUNI



Mazkur maqola O‘zbekiston Xalq demokratik partiyasiga saylovoldi tashviqoti uchun ajratilgan bepul nashr maydoni doirasida e’lon qilinmoqda.

3-betga qarang.

O‘ZBEKISTON ELEKTROTEXNIKA XABIGA AYLANA OLADIMI?

Bir necha o‘n yillar avval yurtimizda mashhur milliy brend ostida elektrotexnika mahsulotlari ishlab chiqarila boshlagani ko‘pchilik tomonidan hayrat bilan kutib olingandi. Brend asta-sekin kengayib, mahsulotlar turi ko‘payib bordi. Ammo uning sifatiga aholi to‘la ishonch bildirmadi, ichki bozorda qimmat bo‘lsa ham xorijnikiga talab yuqori bo‘lib turaverdi.

Kundalik turmushda foydalani-ladigan maishiy texnika vositalari uzoq xizmat qilishi uchun chet elni-kini olishimiz kerak, o‘zimizniki esa talabga javob bermasdi. Qolaversa, milliy mahsulotlar bozorida raqobat ham yo‘q, qayerga qaramang, bir nomdagi brendni uchratish mumkin edi.

Keyingi yillardagi yurtimiz mahalliy sanoati rivojiga nazar solinsa, aynan elektrotexnika tarmog‘idagi katta o‘zgarishlar yaqqol ko‘zga tashlanadi. So‘nggi yetti yilda sohaga 1 milliard dollar investitsiya kiritilgan. Natijada 762 ta korxona ishga tushirilib, 45

turdagi yangi mahsulot tayyorlash yo‘lga qo‘yilgan. Ishlab chiqarish hajmi 1,8 barobar o‘sgan. Sohada mahalliyashtirish ko‘rsatkichi bir necha barobar ortgani, ichki bozorni egallayotgan milliy brend mahsulotlarimiz xorijga ham faol eksport qilinayotgani katta yutuqlarimizdan. Hozir mahsulotlar nomi ham xilma-xil va aksariyati o‘zimizda ishlab chiqarilmoqda. Qaysidir korxonada har 15 soniyada bitta muzlatkich tayyor bo‘lishi ham lof emas, ishonavering.

Davomi 4-betda



DUNYO BO‘YLAB SAYLOVLAR YILI

SAYLOV QONUNCHILIGIGA OID MUHIM O‘ZGARISHLAR NIMALARDAN IBORAT?



Alisher ESHONQULOV,
Davlat boshqaruvi akademiyasi dotsenti v.b.

Joriy yil dunyo siyosiy maydonida saylovlar yili, desak mubolag‘a bo‘lmaydi. Sababi, 2024-yilda 64 ta davlatda Prezident va parlament saylovlari o‘tkazilishi rejalashtirilmoqda. Ushbu saylovlarda 4 milliardga yaqin saylovchi qatnashishi kutilmoqda. Bu esa dunyo aholisining qariyb yarmini tashkil etadi. Eng ko‘p saylovlar bo‘yicha Yevropa mintaqasi 20 ta mamlakat bilan peshqadam. Shuningdek, Afrikaning 18 ta, Osiyoning 16 ta, Amerikaning 7 davlati va Okeaniyaning 4 mintaqasida ushbu muhim siyosiy jarayon o‘tkaziladi.

Osiyo mintaqasining 12 ta davlatida parlament saylovi o‘tkazilishi belgilangan. Jumladan, O‘zbekiston Respublikasining yangi taraqqiyot bosqichi uchun ham yangi saylov tizimi asosida saylov o‘tkaziladi.

Markaziy saylov komissiyasi 26-iyul kundan mamlakatimizda Oliy Majlis Qonunchilik palatasi va mahalliy kengashlar deputatlari saylovi bo‘yicha saylov kompaniyasi boshlanganini e‘lon qildi. Bu juda dolzarb va ahamiyatli siyosiy jarayon boshlangani hamda siyosiy partiyalar o‘rtasida saylovchilarning har bir ovozi uchun bellashuv qizg‘in bo‘lishini



anglatadi. Ushbu saylov “Mening tanlovim — obod vatanim” shiori ostida o‘tkaziladi.

Joriy yil 27-oktabr kuni o‘tkaziladigan mazkur siyosiy jarayon mamlakatimiz va xalqaro miqyosida alohida xususiyatlari bilan ajralib turadi. Jumladan, saylov ilk marotaba yangi tahrirdagi Konstitutsiyamizda belgilab berilgan mutlaqo yangi ijtimoiy-siyosiy

muhitda, parlament va mahalliy kengashlarning davlat hokimiyati tizimidagi o‘rni va vakolatlari sezilarli darajada kuchaytirilgan sharoitda o‘tkazilmoqda. O‘ziga xos jihatlar quyidagilar bilan ajralib turadi.

Birinchidan, saylov yangi konstitutsiyaviy sharoitda o‘tkaziladi. O‘tgan yili referendum asosida qabul qilingan yangi tahrirdagi Konstitutsiyada xalq deputatlari kengashiga uning deputatlari orasidan qonunga muvofiq saylanadigan rais boshchilik qilishi, shuningdek, viloyat, tuman, shahar hokimi lavozimini egallab turgan shaxs bir vaqtning o‘zida xalq deputatlari kengashi raisi lavozimini egallashi mumkin emasligiga oid yangi norma mustahkamlandi. Bu shundan dalolat beradiki, bu yilgi saylov yakunlari bo‘yicha xalq deputatlari viloyatlar va Toshkent shahri kengashlariga rais yangi saylanadigan deputatlar orasidan tanlanadi.

Ikkinchidan, Qonunchilik palatasidagi 150 ta deputatlik o‘rningi teng yarmi — 75 deputat majoritar saylov tizimiga muvofiq hududiy bir

saylovni o‘tkazish uchun yagona saylov okrugi tuziladi. Bunda O‘zbekiston Respublikasining butun hududi yagona saylov okrugi hisoblanadi. Qonunchilik palatasiga bo‘lib o‘tadigan saylovda bir mandatli saylov okruglarining har biridan 1 nafardan deputat saylanadi.

Avvalgi saylovlar to‘lig‘icha mojaritar saylov tizimi asosida o‘tkazilgan. Unda Qonunchilik palatasi deputatlari saylovni o‘tkazish uchun mamlakatda tuzilgan 150 ta hududiy saylov okrugining har biridan nomzodlarning 1 nafari deputat etib saylangan.

Uchinchidan, saylov qonunchiligi ilg‘or demokratik standartlarga mos ravishda tubdan takomillashtirildi. Jumladan, saylov organlarining Markaziy saylov komissiyasi boshchiligidagi yangi tizimi joriy etildi, siyosiy partiyalar tomonidan deputatlikka nomzodlarni ko‘rsatishda ayollarning ulushi kamida 40 foiz bo‘lishi belgilandi.

Deputatlikka nomzod saylanishi uchun saylovchilarning nisbiy ko‘pchiligi ovozi olishi belgilandi. Unga ko‘ra, nomzod tegishli saylov okrugida boshqa nomzodlarga nisbatan ko‘proq ovoz to‘plagan taqdirda deputat bo‘lib saylanishi mumkin bo‘ladi va shu orqali takroriy ovoz berishni tashkil etish talab etilmaydi.

To‘rtinchidan, avvalgi saylovlarda ovoz berishda ishtirok etgan saylovchilarning yarmidan ko‘pi (50+1), ya‘ni mutlaq ko‘pchilik ovozi olingan nomzod saylangan deb hisoblangan. Unda deputatlikka nomzodlar ishtirokchi saylovchilardan yarmidan ko‘pining ovozi to‘play olmagani taqdirda eng ko‘p ovoz to‘plagan 2 nomzod o‘rtasida takroriy ovoz berish o‘tkazilgan. Masalan, 2019-yil 22-dekabrda bo‘lib o‘tgan Oliy Majlis Qonunchilik palatasi deputatlari saylovida 25 ta saylov okrugi bo‘yicha nomzodlarning birortasi ham ovoz berishda ishtirok etgan saylovchilardan yarmidan ko‘pining ovozi to‘play olmagani sababli 2020-yil 5-yanvar kuni takroriy ovoz berish o‘tkazilgan.

Endi yangilangan saylov tizimi bo‘yicha Qonunchilik palatasi deputatlari saylovni o‘tkazish uchun 75 ta hududiy bir mandatli saylov okrugi bo‘yicha ovoz berishda ishtirok etgan saylovchilarning boshqa nomzodlarga nisbatan ko‘proq ovozi (nisbiy ko‘pchilik) olingan nomzod saylangan deb hisoblanadi. Bu bilan nomzodni tanlab olish uchun avval shart etib belgilangan 50+1 qoidasi bekor bo‘ldi

va vakillik organlari uchun takroriy ovoz berish instituti tugatildi. Bu, o‘z navbatida, saylov o‘tkazish uchun sarflanadigan mehnat resurslarini kamaytirish va moliyaviy xarajatlarni tejashga olib keladi.

Beshinchidan, saylov jarayonlariga kiritilgan yangiliklarga ko‘ra, endi Qonunchilik palatasiga saylovda yagona saylov okrugi bo‘yicha ovoz berishda ishtirok etgan saylovchilarning kamida 7 foiz ovozi olingan siyosiy partiyalar belgilangan tartibda mandatga ega bo‘ladi. Aks holda, ushbu siyosiy partiyaqa Qonunchilik palatasidagi deputatlik o‘rinlari taqsimlanmaydi. Bu, o‘z navbatida, siyosiy partiyalar o‘rtasida siyosiy raqobat o‘rtishi, saylovchilar oldida siyosiy partiyalar mas’uliyati oshishi, shu bilan birga, jamiyatda siyosiy ong va siyosiy madaniyat, aholining ijtimoiy-siyosiy faolligi yanada yuksalishiga imkon beradi.

Yulksalishiga imkon beradi. Birinchidan, saylov yangi tahrirdagi Konstitutsiyada mustahkamlangan kuchli parlamentarizm va joylarda vakillik organlarining vakolatlari sezilarli darajada kuchaytirilgan sharoitda bo‘lib o‘tadi. Xususan, Qonunchilik palatasining mutlaq vakolatlari amaldagi 5 tadan 12 taga, Senatda esa 12 tadan 18 taga ko‘paytirildi. Parlamentning ijro etuvchi, sud, huquqni muhofaza qiluvchi organlar va maxsus xizmatlar faoliyati ustidan nazorat funksiyalari kengaytirildi.

Qolaversa, joriy yil saylovda Qonunchilik palatasining 150 nafar deputati, Senatning 56 nafar a‘zosi, Qoraqalpog‘iston Respublikasi Jo‘qorg‘i Kengeshining 65 nafar deputati, viloyatlar va Toshkent shahri, 208 ta tuman (shahar) kengashlari deputatlari saylanadi. Shunga ko‘ra, 30 mingga yaqin nomzod, ularning 90 mingga yaqin ishonchli vakili saylov jarayonida faol ishtirok etishi hamda saylov komissiyalarining 120 mingdan ortiq a‘zosi tashkilotchi sifatida, 70 mingdan ortiq mahalliy va xorijiy (xalqaro) kuzatuvchi ishtiroki kutilmoqda.

Yettinchidan, bu yilgi saylov jarayonlari to‘liq raqamlashtirildi. Ya‘ni “E-saylov” axborot tizimi ishga tushirildi. Bu saylov jarayonidagi ortiqcha qog‘ozbozlik va sarf-xarajatlarni kamaytirish, qolaversa, saylov jarayoniga oid ma‘lumotlardan tez va samarali foydalanishga xizmat qiladi. Ushbu tizim orqali saylov komissiyalarining siyosiy partiyalar, nomzodlar, kuzatuvchilar va ommaviy axborot vositalari

bilan deyarli 60 turdagi munosabati to‘liq elektron tarzda amalga oshiriladi.

Bundan tashqari, Qoraqalpog‘iston Respublikasi hududida O‘zbekiston Respublikasi Prezidenti va Qonunchilik palatasi deputatlari saylovlariga tayyorgarlik ko‘rish va ularni o‘tkazish bilan bog‘liq hududiy saylov komissiyalari vakolatlarini Qoraqalpog‘iston Respublikasi Markaziy saylov komissiyasi amalga oshirishi belgilandi hamda O‘zbekiston Respublikasi Prezidenti saylovini, O‘zbekiston Respublikasi referendumini va Qonunchilik palatasi deputatlari saylovini o‘tkazish bo‘yicha qilingan komissiyalarini tuzish amaliyoti bekor qilindi. Bu, o‘z navbatida, mavjud xarajatlarni iqtisod qilish va inson resurslaridan maqsadli foydalanish imkonini yaratdi.

Ushbu jarayonlardagi yana birmuhim yangilik shuki, endi hududiy saylov komissiyalarining 3 nafarga qadar a‘zosi komissiyada doimiy asosda faoliyat yuritishidir. Chunki hududiy saylov komissiyasi vazifalarining qonun talablari asosida to‘laqonli va sifatli ta‘minlashi ushbu a‘zolarining komissiyada doimiy asosda faoliyat yuritishi bilan bevosita bog‘liq. Bundan tashqari, qonunchilikda Markaziy saylov komissiyasi raisi 5 yillik muddatga saylanishi va ayni bir shaxs surunkasiga 2 muddatdan ortiq Markaziy saylov komissiyasi raisi etib saylanishi mumkin emasligi qat‘iy ravishda belgilab qo‘yildi.

Bugun saylov jarayonlarida 5 ta siyosiy partiya: Tadbirkorlar va ishblarmonlar harakati — O‘zbekiston Liberal-demokratik partiyasi, O‘zbekiston “Milliy tiklanish” demokratik partiyasi, O‘zbekiston Ekologik partiyasi, O‘zbekiston Xalq demokratik partiyasi, O‘zbekiston “Adolat” sotsial-demokratik partiyasi tomonidan bir mandatli saylov okruglari bo‘yicha Oliy Majlis Qonunchilik palatasi deputatligiga 375 nafar nomzod, yagona saylov okrugi bo‘yicha siyosiy partiyalar tomonidan ko‘rsatilgan jami 500 nafar partiya ro‘yxatidagi nomzod ro‘yxatga olindi.

Qoraqalpog‘iston Respublikasi Jo‘qorg‘i Kengesi, xalq deputatlari viloyatlar, Toshkent shahri hamda tumanlar (shaharlar) kengashlariga har bir partiyadan nomzodlar ro‘yxatga olingan bo‘lib, deputatlik mandati uchun 28 ming 475 nafar nomzod kurash olib boradi. Umuman olganda, ular oldida ulkan mas’uliyatli davr boshlandi.

Shu bilan birga, saylovchida ham katta mas’uliyat yuki bor. Bu mas’uliyat shuki, mamlakat taraqqiyoti yangi bosqichining keyingi besh yillik istiqboli saylovchilar tanlaydigan nomzodlarga bog‘liq. Bugun fuqarolarning siyosiy madaniyati yuksaldi, kechagi saylovchidan, elektorlardan tubdan farq qiladi. Bu esa “Jamiyat — islohotlar tashabbuskori” bo‘lib borayotgani isbotidir.

OIIB BUTUN MARKAZIY OSIYO UCHUN MUHIM INFRATUZILMA LOYIHALARINI AMALGA OSHIRISHDA O‘ZBEKISTONNING STRATEGIK HAMKORI

Xorijiy ishtirokchilar va ekspertlar 25-26-sentabr kunlari Samarqandda bo‘lib o‘tgan Osiyo infratuzilmaviy investitsiyalar banki Boshqaruvchilari kengashining IX yillik yig‘ilishi haqida o‘z fikrlarini bildirdilar.

Prezident Shavkat Mirziyoyev Osiyo infratuzilmaviy investitsiyalar banki Boshqaruvchilari kengashining IX yillik yig‘ilishi ochilish sessiyasida ishtirok etdi. Davlatimiz rahbari o‘z nutqida OIIB bilan o‘rta shaharlarni rivojlantirish va qishloq joylarda infratuzilmani yaxshilash bo‘yicha hamkorlikning keyingi istiqbollariga to‘xtalib o‘tdi. Ta’kidlanganidek, yaqin yillarda quyosh, shamol va gidro elektrostansiyalari, infratuzilma obyektlari va tarmoqlarini qurish, yirik “yashil” ma’lumotlar markazlarini tashkil etish ham ko‘zda tutilgan. Bundan tashqari, qayta tiklanuvchi energiya manbalari hisobiga “yashil” sertifikatlar bozorini shakllantirish rejalashtirilgan. Ushbu sa’y-harakatlar Markaziy Osiyoni “yashil” energiyaning yirik eksportchisiga aylantirishga xizmat qilishi alohida qayd etildi.

Pavel SHIBEK,
Polsha moliya vazirligining xalqaro hamkorlik departamenti direktori:



— Ushbu tadbirda ko‘plab masalalar qatori O‘zbekiston Prezidentining ta’limga alohida to‘xtalgani meni hayratda qoldirdi. Darhaqiqat, ta’lim iqtisodiyotining o‘sishi uchun eng muhim omil hisoblanadi. Polsha 1989-yildan keyin juda quyi darajadan rivojlana boshlagan va ta’limga qaratilgan sa’y-harakatlar tufayli YIMni sezilarli darajada oshirishga muvaffaq bo‘lgan mamlakatdir.

Menimcha, yuqori malakali ishchi kuchi zarur bo‘lgan zamonaviy geosiyosiy dunyoda sifatlari ta’lim dolzarb ahamiyatga ega. Rivojlanishda davom etayotgan mamlakat uchun bilimli jamiyatga ega bo‘lish muhimdir. O‘zbekiston rahbarining

nutqidan mamlakatimiz keyingi yillarda, ayniqsa, oliy ta’lim va undan foydalanish sohasida katta yutuqlarga erishganini ko‘rish mumkin.

Mark KUSSEN,
Bretton-Vuds tizimini qayta ko‘rib chiqish qo‘mitasi tahlil markazi direktori:



— Ushbu yirik tadbirda ishtirok etib, mamlakatimizning hozirgi rivojlanishini kuzatish men uchun qiziqarli bo‘ldi. O‘zbekiston Prezidenti tobora tarqoqlashib borayotgan global iqtisodiyot sharoitida mamlakatning yanada yuqoriga o‘sishi va barqarorlikka erishish qobiliyatiga ishonadi.

Nafaqat mamlakatimizda, balki umuman, Markaziy Osiyoda ham katta yutuqlarni ko‘rmogdaman. Investitsiyalar va infratuzilmani rivojlantirish tobora muhim ahamiyat

Li CHJEN,
Xitoy Ijtimoiy fanlar akademiyasining Rossiya, Sharqiy Yevropa va Markaziy Osiyo instituti direktori o‘rinbosari:



— Qisqa vaqt ichida yuksak darajadagi yirik xalqaro anjumanlarning e’tirof etilgan markazlaridan biriga aylangan go‘zal va betakror Samarqand shahri dunyoning turli burchaklaridan kelgan xorijlik mehmonlarni yana kutib oldi. Jumladan, 25-sentabr kuni ushbu qadim kentda Osiyo infratuzilmaviy investitsiyalar banki Boshqaruvchilari kengashining yillik yig‘ilishi ochilishi bo‘lib o‘tdi va unda O‘zbekiston Prezidenti Shavkat Mirziyoyev nutq so‘zladi.

O‘zbekiston rahbari o‘z nutqi bilan dunyoning 100 dan ortiq davlatidan 2 mingga yaqin delegat ishtirok etgan mazkur xalqaro tadbirning barcha ishtirokchilariga kuch va shijoat bag‘ishladi. Anjumanda qatnashayotgan ishtirokchilar soni 2015-yilda Osiyo infratuzilmaviy investitsiyalar banki

tashkil etilganidan buyon Markaziy Osiyo mintaqasida ilk bor o‘tkazilayotgan mazkur tadbirning global ahamiyatidan dalolat beradi.

Prezident Shavkat Mirziyoyev jahondagi bugungi vaziyatga qisqacha to‘xtalib, O‘zbekistonda amalga oshirilayotgan islohotlarning asosiy yutuqlari va mamlakat oldida turgan strategik vazifalar bilan tanishtirdi. Shuningdek, Osiyo infratuzilmaviy investitsiyalar banki bilan hamkorlikning ustuvor yo‘nalishlarini belgilab berdi.

O‘z-o‘zidan ayonki, OIIB nafaqat mamlakat, balki butun Markaziy Osiyo mintaqasi uchun muhim sanalgan qator infratuzilma loyihalarini amalga oshirishda O‘zbekistonning strategik hamkoriga aylandi.

kasb etmoqda. O‘ylaymanki, mintaqada va mamlakatimizda butun dunyo bo‘ylab investitsiyalarni jalb qilishi kerak bo‘lgan muhim jihatlar bor.

O‘zbekiston Markaziy Osiyo mamlakatlari singari dengizga chiqish imkoniyatiga ega emas, shuning uchun o‘zaro bog‘liqlik va infratuzilma iqtisodiy o‘shish hamda uning imkoniyatlarini ochishda muhim ahamiyatga ega. Tarix, Buyuk ipak yo‘lining bir qismi bo‘lgan go‘zal Samarqand shahrini ko‘rganimdan faxrlanaman. Ipak yo‘lini tiklash nafaqat yangi investitsiyalarni jalb etish, balki aholining o‘sishi va iqtisodiy rivojlanish yo‘lini yaratish uchun barqaror, “yashil” va inklyuziv bo‘lishi kerak bo‘lgan investitsiyalardir.



Kozim NIYOZ,
Pokiston Iqtisodiy ishlar vazirligi kotibi:

— 25-26-sentabr kunlari O‘zbekistonda bo‘lib o‘tgan Osiyo infratuzilmaviy investitsiyalar banki Boshqaruvchilari kengashining yillik yig‘ilishida ishtirok etish Pokiston va O‘zbekiston o‘rtasidagi hamkorlikni rivojlantirishda muhim bosqich bo‘ldi. Uchrashuvda barqaror infratuzilmani rivojlantirish, toza energiya va raqamli transformatsiya masalalariga bag‘ishlangan asosiy sessiyalar bo‘lib o‘tdi. Bu mavzular, ayniqsa, Pokistonga tegishilligi bilan yanada muhimdir.

Tadbirda transport va energetika infratuzilmasini yaxshilashga qaratilgan loyihalarini moliylashtirishning yangi imkoniyatlari, shuningdek, barqaror shaharlarni rivojlantirish dasturlari muhokama qilingan sessiyada ishtirok etdim.

OIIB O‘zbekistonning asosiy hamkori bo‘lib, fuqarolarning hayot sifatini yaxshilash, ish o‘rinlarini yaratish va barqaror rivojlanish maqsadlariga erishishga qaratilgan ulkan infratuzilma loyihalarini amalga oshirishga ko‘maklashayotganini iqtisodchi sifatida, ayniqsa, yuqori baholayman.



YANGI O‘ZBEKISTON MUALLIMLARI

*Biz bilgan farishta, chehrasida fayz,
Tolibi Farhoddir, biri esa Qays,
Siz o‘sha muallim — ustoz Abu Lays,
Olamning ko‘zgusi, ilm zargari,
Yangi O‘zbekiston muallimlari.*

*Biringiz Forobiy, biringiz Jadid,
Bu yo‘lga ko‘p bora qildilar tahdid,
Ammo bukindi ishonch va umid,
Tan bermish dunyoning zo‘r olimlari,
Yangi O‘zbekiston muallimlari.*

*Hayratda Kembrij, hayratda Parij,
Naqadar ulug‘vor bizning yuksalish,
Dunyoni lol etdi buyuk o‘zgarish,
Bukun asqatmoqda zo‘r ta‘limlari,
Yangi O‘zbekiston muallimlari.*

*Har yerda yangilik, innovatsiya,
Ilmdan boshqasi bo‘lmas aksiya,
Shavkating ortmoqda, dilda madhiya,
Ma‘rifat darg‘asi bor qavmlari,
Yangi O‘zbekiston muallimlari.*

*Beshta tashabbusning doyasi sizdir,
Tog‘ bo‘lsak, shu tog‘lar qoyasi sizdir,
Buyuk ma‘naviyat g‘oyasi sizdir,
Ijod maktabidir ko‘zin gavhari,
Yangi O‘zbekiston muallimlari.*

*Sportda, san‘atda, fanda o‘zingiz,
Iqbolli balandsiz, yorug‘ yuzingiz,
Ishonchni oqlaydi o‘g‘il-qizingiz,
Siz hamon buyuksiz, dunyo sarvari,
Yangi O‘zbekiston muallimlari.*

*Hamisha kasbga sodiq qolgansiz,
Ma‘rifat sohibi nomin olgansiz,
Uchinchi Uyg‘onish bongin chalgansiz,
Siz ila borgaymiz buyuklik sari,
Yangi O‘zbekiston muallimlari.*

Ashurali BOYMUROD,
Yozuvchilar uyushmasi a‘zosi

1-oktabr — O‘qituvchi va murabbiylar kuni YOSHLIK ORTGA QAYTSA EDI...

**Dilbar NORMURODOVA,
Termiz shahridagi 11-maktab o‘qituvchisi,
“Shuhrat” medali sohibi**

“Dunyo imoratlari ichida eng ulug‘i maktabdir”, deydi ulug‘ ma‘rifatparvar bobomiz Mahmudxo‘ja Behbudiy. Darhaqiqat, bu maskanda qalb tarbiyalanadi, vatan chizgisi dilga muhrlanadi. Ushbu dargoh o‘zlikni tanitadi, odamiyligni o‘rgatadi.

35 yillik ish tajribasiga egaman. Bugun mamlakatimizda ta‘lim sohasidagi islohotlar, yangiliklar va o‘zgarishlarni ko‘rib, qaytadan yana yosh bo‘lib qolgim keladi. Rosti, bir paytlar maktab boshlanishi bilan paxta dalasida javlon urardik, o‘quvchilarimiz bilan berilgan rejani bajarish uchun tongdan otlar edi, quyosh botganda qaytardik. So‘lim kuzning bag‘ridagi ajoyib bayram — 1-oktabrni ham dalada kalish olish bilan xursand bo‘lib nishonlardik. Qoq yangi yil oldi xaxlab qolgan maktab bag‘riga qaytib, jun paypoqda ham muzlab, dars berardik.

Bugun bari boshqacha, bari ko‘z qunvar, dil yayrar darajada. Yurtimiz bayrog‘ini ko‘klarga ko‘tarayotgan yoshlarni ko‘rib, quvonch yoshlari yuzlarimni yuvadi. Ko‘nglimda hayajon, dilimda g‘urur, qalbmida faxr. “Mana bizning yoshlar, mana bizning kelajagimiz”, deyman.

Ha, haqiqatan, ta‘lim sohasidagi ishlardan ko‘zlangan maqsad yorug‘ mash‘ala yog‘dusi bilan nurafshon. Qanchadan qancha maktablar zamonaviy qiyofada, moddiy-texnik ta‘minoti yangilangan. Elektron doskalar, kompyuterli sinflar, asbob-uskunaga boy laboratoriyalar, kasbga yo‘naltirish uchun qulayliklarga ega sinfonalar, kuzatuv kameralari, kirish va chiqish uchun mo‘ljallangan turniketlar — hali buni yana qancha davom ettirish mumkin. O‘quvchilar ham, o‘qituvchilar ham qog‘ozbozlikdan qutulgan, hammasi elektronlashtirilgan.

Prezidentimizning “O‘zbekiston — 2030” strategiyasini “Yoshlar va biznesni o‘llab-quvvatlash yili”da amalga oshirishga oid davlat dasturi to‘g‘risida”gi farmonida ham tizimda qator islohotlar belgilangan. Xususan, “Ta‘lim uchun qulay muhit” dasturini amalga oshirish maqsadida maktablarni toza ichimlik suv va zamonaviy sanitariya-gigiyena infratuzilmasi bilan to‘liq ta‘minlash rejalashtirilgan.

Umumiy o‘rta ta‘lim tizimini yangi bosqichga olib chiqish maqsadida 700 ga yaqin nomdagi yangi darsliklar, mashq daftarlari, pedagoglar uchun metodik qo‘llanmalar va mobil ilovalar, shuningdek, yangi avlod darsliklari asosida planshetlar uchun 1000 ta multimedia dasturi yaratish ko‘zda tutilgan.

Maktablarga har yili 500 nafar xorijiy mutaxassis jalb etiladigan bo‘ldi. Barcha maktablarda kasb-hunarga o‘rgatish kurslari ish boshladi.

Prezident maktablari va ixtisoslashtirilgan maktablarning ta‘lim metodikasi barcha umumiy o‘rta ta‘lim muassasalari o‘quv jarayonlariga joriy qilinishi borasida ham qator ishlar rejalashtirildi.

Bir muallima sifatida yana bir jihat meni juda quvontiradi: yangi tahrirdagi Konstitutsiyamizda davlatning o‘qituvchilar sha‘ni va qadr-qimmatini himoyalashi, ijtimoiy va moddiy farovonligi, kasbiy jihatdan o‘sishi to‘g‘risida g‘amxo‘rlik qilishi kafolatlandi. Bundan tashqari, “Pedagogning maqomi to‘g‘risida”gi qonun qabul qilindi. E’tibor va g‘amxo‘rlik, imkoniyatlar faqat yangiliklar sari undayaveradi.

Ta‘lim va tarbiya — uzviy jarayon. Bu borada ham ishlar ilgariqlamoqda. Birgina misol. Ta‘lim sohasidagi indikatorlar sarhisobida Surxondaryo bir necha yil 14-o‘rinni hech kimga bermay kelgan



edi, bundan shaxsan o‘zim qiynalar edim. Bugun esa 14-o‘rindan 7-o‘ringa ko‘tarilishi izlanish va imkoniyatlardan unumli foydalanish natijasi bo‘ldi.

Maktabimiz “Tashabbusli budget”da ketma-ket 2-marta g‘olib bo‘ldi, buning natijasida maktabning qiyofasi butunlay o‘zgardi, moddiy-texnik baza yaxshilandi. Qolaversa, kasbdoshlarimizning yutuqlari ham bizni ishlagusha undamoqda.

— Men “vazir ustamasi” sohibi bo‘ldim, — deydi Termiz shahridagi 23-maktabning ona tili



Yaqinlarimni sog‘inaman, ammo BOLALAR MEHRI SHU QISHLOQDA QOLISHGA UNDAYVERADI

“Nakurt” mahalla fuqarolar yig‘inining Qo‘shilish qishlog‘i Payariq tumani markazidan 70 kilometr uzoqda joylashgan. Yam-yashil kengliklar, purviqor tog‘lar bag‘ridagi qishloqning asosiy yo‘li soy yoqalab o‘tadi. Yolg‘izoyoq yo‘lining ikki tomonida mevali va manzarali daraxtlar bo‘y cho‘zgan. Uzoqdan oqarib turgan mo‘jazzina bino ko‘zga tashlanadi.

Bu qishloqdagi 40-umumta‘lim maktabi. 100 o‘ringa mo‘ljallangan maktab bahavo adirlkda joylashgan, yuzlari qir shamoli va quyoshda qoraygan bolalar ta‘lim muassasasiga 3-5 kilometr yo‘l bosib keladi. O‘qishga ishtiyoqi baland qorako‘zlar uchun masofaning ahamiyati yo‘qdek go‘yo. Tabiat inijliklari ularga kor qilmaydi. Deylik, kuz va qish oylarida soy suvi ko‘payishi tufayli yo‘lda yurishning imkoni bo‘lmay qolgan paytlarda ham bolalar ba‘zan loy, ba‘zan suv kechib maktabga kelgan paytlari ko‘p bo‘lgan. Qishloq ahlidan shu haqdagi hikoyalarni eshitir ekanman, mashhur adib Chingiz Aytmatovning “Birinci muallim” asaridagi mana bu bitiklar yodingma tushadi:

“Bo‘lmasa tizzadan suv kechib, izg‘irinda nafasimiz kesilib, shuncha uzoq joyga — tepalikka har kun qatnab, tinka-madorimizni quritishga bizni kim majbur qilardi, deysiz? Maktabga o‘z ixtiyorimiz bilan havas qilib borardik. O‘qishlarimga borsalarimga-chi, deb boshliq qistovga oladigan hech kim yo‘q edi... Dushshening darslariga quloq solib, o‘qish bilan mashg‘ul bo‘lardik”.

O‘quvchi qalbiga yo‘l topilgan joyda boshqa sabablar bekor. Bilimi, mehri dunyovalik keng ustozlar bor ekan, maktab muqaddas dargoh, ustoz esa misli shamchiroq bo‘lib o‘ziga chorlab turaveradi.

Yaqubovlar oilasi asli Xorazmdan. Oila boshi Qodirberdi Yaqubov uzoq yillar Xonqa tumanidagi 1-umumta‘lim maktabida jismoniy tarbiyadan, turmush o‘rtog‘i Zumrad

Jumaniyozova esa tarix fanidan o‘quvchilarga saboq berib kelgan. Hayotini maktab va o‘quvchilar bilan bog‘lagan o‘qituvchilar halolligi, jonkuyar va fidoyiligi bilan e‘tirasida hurmat, e‘tibor zozongan.

Qodirberdi aka va Zumrad opa olis hududda ishlashni ixtiyor etganida avvaliga yaqinlari hayron bo‘ldi. Ammo bir qarorga kelingan, ularning Payariq tumanidagi 40-maktabda ish boshlashi aniq bo‘lgan edi.

Qishloq ahli sodda, tanti. Ular o‘zga yerlik muallimlarni katta hurmat bilan kutib oldi. Darrov ijaraga uy berildi. Qo‘ni-qo‘shni tez-tez xabar olib turar, o‘zlari uchun tayyorlagan tansiq taomlardan ilinar, begona joyning pastu balandi haqidagi hikoyalarni yangi mehmonlar uchun ham juda qiziq edi. Mehri issiq bu el yangi o‘qituvchilarning qishloqqa moslashishi uchun borini ayamadi. Muallimlar ham birpasda shu yerlik odamlarga qo‘shilib ketdi.

— 2022/2023-o‘quv yilidan ish boshladik. Biz bu yerga kelgunga qadar tarix fanidan mutaxassis yo‘qligi sabab dars o‘tilmagan, — deydi Zumrad Jumaniyozova. — Bu fanni yangi metodika bo‘yicha o‘ta boshlaganimdan keyin nafaqat bolalar, balki ota-onalarning ham qiziqishi ortdi. Ular men bilan suhbatlashish uchun maktabga tez-tez keladigan bo‘ldi. O‘quvchilarim faqat olimpiadalarda tuman, viloyat bosqichlarida sovrinli o‘rinlarni qo‘lga kiritmoqda.

Ta‘lilda Xorazmga ketib qolsak, ota-onalar, o‘quvchilar telefon qilib hol-ahvol so‘raydi. “Qachon kelasiz?” deya betoqat bo‘ladi. Qishloq ahlining cheksiz hurmatidan boshim osmonga



yetadi. Pedagog uchun bundan katta baxt bormi?

Qishloq maktabida ilk muallima ayol sifatida ish boshlagan Zumrad opa bu yerga go‘yoki o‘zi bilan yangi nafas olib kirdi. U pedagog sifatida bolaning hafsalasizligiga yo‘l qo‘ymaslik eng asosiy vazifasi ekanini yaxshi bilardi. Shu bois, tarix fani bilan birga o‘quvchi qizlarga odoab-xloq sirlarini ham o‘rgata boshladi. Ularning bilimga qiziqishini oshirish, kasb-hunarga

yo‘naltirishga e‘tibor qaratdi. Maktabda sinflar o‘rtasida “Zakovat” intellektual o‘yini tashkil etildi. To‘garaklar ish boshladi.

Ta‘limdagi o‘zgarishlar, islohotlar bu maktabga ham kirib bordi. O‘z ustida ishlagan, malaka oshirgan, toifaga ega bo‘lgan ustozlar soni ortib borar ekan, o‘qitish sifati ham yuksaldi. Yangi metodikalar qo‘llanila boshlandi. Bu bolalarning bilimi va intilishlarida o‘z aksini

topdi. Joriy yilda bitiruvchilarining 60 foizi oliy ta‘lim muassasalariga qabul qilindi. Bundan ikki yil avval maktab “qizil” toifada edi. Ayni paytda bir necha tamoyillar asosida “yashil” maqomini oldi. Bunday, albatta, Qodirberdi aka va Zumrad opaning hisssasi alohida.

— Qiyinchiliklar yo‘q deb ayta olmayman. Ayol kishi emasmanmi, uyni, yaqinlarimni sog‘inaman. Ammo bolalarning katta hurmat va intilishini ko‘rib, shu yerda qolishim kerakligini his qilaman. Biz kelguncha qishloqda internet bo‘lmagan. Bolalar telefonga o‘rganmagan. Ular bilimga chanqoq. Zehni o‘tkir, eshitganini ilib oladi. Farzandlarimdek bo‘lib qolgan bu bolalarni tashlab ketishga ko‘zim qiymaydi. Ko‘zlari yonib turadigan o‘g‘il-qizlar orasida etagiga yurt qoragaydigan asl insonlar chiqishiga ishonchim komil, — deydi Zumrad Jumaniyozova.

O‘qituvchilik katta fidoyilik talab etadigan kasblardan biridir. Chunki har bir o‘quvchida alohida salohiyat borligini ilg‘ash, uni yuzaga chiqarish katta mehnat talab qiladi. Zahmatli, ammo sharaflil bo‘lib mehnat qilishda etaga insoniyatga nafi tegadigan olim, shifokor, uchuvchi yoki muhandis yetishib chiqishi mumkin. El orasida hurmat-e‘tibor topgan qaysiki kasb egalari bor, ustoz va murabbiylarning samarali mehnati mahsulidir. Ular etarga qanday muvaffaqiyatga erishishidan qat‘i nazar, qalbining to‘rida hamisha ustoz yodi, minnatdorlik tuyg‘ulari hukmron bo‘lishi muqarrar.

— Qishloq juda xushmanzara, bu yerda hatto ekoturizmni rivojlantirish mumkin, — deydi Qodirberdi Yaqubov. — Yam-yashil yo‘l, shuvillab oqayotgan soy, orqada viqor to‘kib turgan tog‘lar, adirlklar har qanday sayyoh e‘tiborini jalb qila oladi. Ammo kuz va qish oylaridagi yog‘inlar yo‘llarda noqulaylik tug‘diradi. Ish boshlagan dastlabki kezlarmiz 2,5-3 kilometrcha yo‘lni yayov bosib o‘tishga to‘g‘ri kelgan, nosoz yo‘lda suv, loy kechgan paytimiz bo‘ldi. Biz-ku, mayli, o‘quvchilar qiynalishi kerak emas. Viloyat hokimligiga shu haqda bildirdik. Yo‘l ta‘miri, ko‘prik qurish bugun navbati bilan qilinmoqda. Mahalliy

aholining, o‘quvchilarimizning ravon yo‘lda yurish orzusi ushlayotganidan xursandman.

Pedagog yosh avlod kelajagiga ta‘sir ko‘rsatadigan har bir mummoni o‘ziga daxldor deb biladi. O‘quvchisining zarur bilim va ko‘nikmaga ega bo‘lishiga xalal bera-yotgan jihatlar, yutuqlariga rag‘bat beradigan omillarni e‘tibordan chetda qoldirmaydi. Mamlakatimizda sport rivojiga qaratilayotgan e‘tibor, o‘sib kelayotgan avlodning har jihatdan sog‘lom va baquvvat bo‘lib voyaga yetishi yo‘lidagi sa‘y-harakatlar uning ham diqqat markazida. Shu sabab bolalarning sportga qiziqishini oshirishni eng katta vazifasi deb biladi.

— Bu yerga kelganimda eski, rangi o‘chgan shaxmat-shashka taxtalaridan boshqa hech narsa yo‘q edi, — deya so‘zida davom etadi Qodirberdi muallim. — O‘zim bilan birga zarur sport inventarlarini olib keldim. Bolalar futbol, voleybol, stol tennisi bilan shug‘ullana boshladi. Mashg‘ulotlarni kengaytirib, boshqa ko‘pgina sport turlarini ham o‘rgatmoqchiman. Qiziqishi juda yuqori. “Besh tashabbus olimpiadisi”da tumanda sovrinli o‘rinlarni qo‘lga kiritdik.

O‘qituvchining maqomi yuksak ko‘rilgan jamiyatda, albatta, rivojlanish bo‘ladi. Shu bois, mamlakatimizda xalq ta‘limi sohasidagi islohotlarni boshlashda qo‘yilgan eng katta vazifa ham jamiyatda ustozning nufuzini oshirish bo‘ldi. Bugun pedagog xodimlarning mehnatiga haq to‘lash, moddiy rag‘batlantirish, ijtimoiy himoya qilish borasida e‘tiborga molik ishlar qilinaypti. Turli yo‘nalishlarda o‘z iqtidorini namoyish etgan ustoz-murabbiylarga ustama va qo‘shimcha haq to‘lash mexanizmi joriy qilingan. Jumladan, Prezidentimizning tegishli qaroriga binoan, olis va chekka hududda ishlayotgan pedagoglarni moddiy rag‘batlantirish tizimi yo‘lga qo‘yilgan. Qahramonlarimiz ham bu imtiyozdan foydalanmoqda.

Muallimlik — ulug‘ maqom. Shogirdning bilimi va salohiyati qay darajadagi ustozning maqomi nechog‘ligini belgilaydi. Ana shu ezigu maqsadga chekka va olis hududlarga borib ishlayotgan o‘qituvchilarni esa e‘tibor, ehtirom, e‘zoz egasi de-yishga to‘la haqlimiz.

**Risolat MADIYEVA,
“Yangi O‘zbekiston” muxbiri**

KITOBXON JAMIYAT

MA’NAVIY TAFAKKUR ILDIZI

NECHOQ‘LIQ TERAN?

Zamon bilan hamnafas

Bugun dunyoda sodir bo‘layotgan to‘qnashuvlar ta’siri voqealardan minglarcha kilometr uzoqdagi davlatlarda ham sezilmoqda. Chunki chegaralar ham, sim to‘sig‘u temir-beton devorlar ham chetdan bo‘ronday yog‘iladigan buzg‘unchi g‘oyalardan saqlay olmaydi. Shu bois, hozir uyg‘oq qalbli va qat’iy irodali bo‘lishimiz har qachongidan muhim. Bunday vaqtda ming yillik o‘lmas qadriyatlardan kuch olish jamiyat, ayniqsa, yoshlarni har qanday yot, buzg‘unchi g‘oyalardan ishonchli himoya qiladi. Zotan, yoshlar ongida qadriyatlarga hurmat tuyg‘usini mustahkamlash kelajak poydevori demakdir.

Umida TESHABOYEVA,
Alisher Navoiy nomidagi O‘zbekiston Milliy
kutubxonasi direktori

“Dunyodagi har qaysi davlat, har qaysi xalq, birinchi navbatda, o‘zining intellektual salohiyati, yuksak ma’naviyati bilan qudratidir. Bunday yengilmas kuch manbai esa, avvalo, insoniyat tafakkurining buyuk kashfiyoti — kitob va kutubxonalarda”, deya ta’kidlagan edi davlatimiz rahbari. Kitob va kitobxonlik intellektual salohiyat va imkoniyatlarni yuzaga chiqarish, bilim va zehni yanada charxlashda azaldan muhim o‘rin tutib kelgan. Tafakkuri, fikr doirasi keng insonlar har qanday jamiyatning chinakam boyligidir. Zero, rivojlanishning asosida ilm, kitobxon xalq turadi.

KUTUBXONALAR SONI
YETARLIMI?

Jamiyat kitobxon bo‘lishi uchun kutubxona faoliyati ham to‘g‘ri yo‘lga qo‘yilgan bo‘lishi kerak. O‘quvchi o‘zi istagan vaqtda zarur kitoblarni topa olishi lozim. Mamlakatimizda kutubxonalarga qaratilayotgan e’tibor zahirida ana shunday shart-sharoitlarni yaratish istagi bor.

Alisher Navoiy nomidagi O‘zbekiston Milliy kutubxonasi mamlakatdagi eng yirik majmuadir. U barcha axborot-kutubxona muassasalari uchun muvofiqlashtiruvchi va uslubiy markaz hisoblanadi. Kutubxonaning umumiy fondi 8 million 108 ming 66 nusxadan iborat. Shundan bosma nashrlar 7 milliondan ziyodni, elektron resurslar soni qariyb 10 ming nusxani tashkil etadi. Foydalanuvchilarning soni kundan kunga ortib bormoqda. Shu kungacha 360 ming 687 kishi kutubxona ro‘yxatidan o‘tgan. Kutubxona fondidan foydalanish uchun bu maskanga bir yilda o‘rtacha 600 mingga yaqin kitobxon keladi.

Prezidentimizning 2019-yil 7-iyundagi “O‘zbekiston Respublikasi aholisiga axborot-kutubxona xizmati ko‘rsatishni yanada takomillashtirish to‘g‘risida”gi qarori sohada katta o‘zgarish yasadi. Jumladan, kitobxonlarga xizmat ko‘rsatish, fondlarni to‘ldirish va saqlash, kutubxona faoliyatini avtomatlashtirish, ilmiy tadqiqot, tashkiliy-uslubiy faoliyat, kadrlar tayyorlash hamda xalqaro hamkorlikni



kengaytirish kabi yo‘nalishlarda yuksalish imkonini berdi. Qaror bilan respublikada yuridik maqomga ega, mustaqil davlat muassasasi bo‘lgan 186 ta tuman (shahar) axborot-kutubxona markazi tashkil etildi. Ularning 90 dan ortig‘i yangi va kapital ta’mirlangan, zamonaviy texnika va jihozlar ega binolarda aholiga xizmat ko‘rsatmoqda. Ayni damda qolgan axborot-kutubxona markazlari ham bosqichma-bosqich yangi binolarda faoliyat boshlashi rejalashtirilgan.

Bugun mamlakatimizda 13 mingdan ziyod axborot-kutubxona muassasasi faoliyat ko‘rsatmoqda. Ulardagi universal fondlar yoshi, millati, ma’lumoti, ijtimoiy kelib chiqishi, ilmiy darajasidan qat’i nazar, barchaga birdek xizmat ko‘rsatadi.

Ushbu kutubxonalardan doimiy foydalanuvchilar soni 11,2 million nafarni tashkil qiladi. Ularda jami 38 million nomdagi 80 million nusxaga yaqin kitob mavjud.

MUTOLAA JAMIYATGA
NIMA BERADI?

Zamonamizga kelib, mutolaaga qiziqish muayyan darajada pasaydi. Bu, albatta, global tendensiya. Ammo



muammo faqat bizda emas-ku deb jim qarab turib bo‘lmaydi. Shu bois, ko‘pgina mamlakatlar aholini mutolaaga qaytarish borasida o‘rganishlar va amaliy ishlarga bel bog‘lagan. Ha, dunyoda bolalar va o‘smirlarda mutolaa madaniyatini rivojlantirish uchun turli yondashuv va usullar izlanmoqda. Chunki axborot oqimi ko‘paygani sari ma’lumotlarni ilmnning asl manbasi bilan qiyoslash, keng tafakkur ila ularni saralashga ehtiyoj ham ortmoqda.

Insonning shaxs sifatida shakllanishi ma’naviy tafakkur ildizining qanchalik chuqur va mustahkamligiga bog‘liq. Bu esa o‘qilgan kitobning muhim nuqtalarini ilg‘ab olishdan iboratdir.



Kitob yosh avlodga ta’sir etishning eng qulay vositasi. U inson his-tuyg‘usi, axloqi, xatti-harakati, dunyoqarashi rivojiga beqiyos ta’sir etadi. Ayniqsa, o‘smir yoshida, ya’ni uning shakllanish davrida alohida o‘ringa ega. Badiiy adabiyot, turli fanlarga doir qiziqarli kitoblar, lug‘atlar, ma’lumotnomalar bolalar ma’naviyatini shakllantirishga asos bo‘ladi. Shu bois, xorij mamlakatlarida ham aholini kitobxonlikka jalb etish borasida turli tajribalarga qo‘l urilmoqda. Masalan, Buyuk Britaniyada bolalar va oilaviy mutolaa davlat tomonidan qo‘llab-quvvatlanadi. Aholining turli qatlamlari orasida mutolaani ommalashtirish uchun bir qancha dasturlar ishlab chiqilgan.

Raqamli dunyo mahsulotlari inson hayotiga kirib borishi bilan, birinchi navbatda, kitobxonlik madaniyatida o‘zgarish yuz bera boshladi. Bu o‘zgarish avlodlar o‘rtasidagi tafovutni yuzaga keltiruvchi omilga aylandi. Pedagog olim Firdevs Guneshning qog‘ozda o‘qish odatini ekranda o‘qish bilan solishtirgan ilmiy tadqiqotida raqamlashtirishning o‘qish madaniyati va odatlariga ta’siri quyidagicha umumlashtirildi: axborotga bo‘lgan munosabat, uni ishlab chiqarish, olish, foydalanish va almashish usuli va jarayonida katta o‘zgarishlar ro‘y bermoqda. Qidiruv mexanizmlari va veb-saytlar qidirilayotgan ma’lumotlarni topishga yordam beradi.

Kitobxonlik odatlari o‘zgarmogda: bolalarda muttasil mutolaani shakllantirish maqsadida shaxsiy namuna bo‘lish, uyda kitob haqida suhbatlashish odati kamaydi. Ularga kitob sovg‘a qilish ham deyarli yo‘q. Uyda kutubxona tashkil etish, kutubxonalar, yarmarkalarga borish, mualliflar bilan uchrashuvlar kabi an’anaviy usullardan asta-sekin voz kechilmoqda. Bu kitobxonlik odatlari ham o‘zgarганиni ko‘rsatadi. Hozir ularning o‘mini elektron pochta, ijtimoiy

tarmoqlar, matnli xabarlar va boshqalar egalladi.

Globalashuv va axborotlashuv jarayoni yanada jadallashgach, jamiyatdagi barcha faoliyatning turi, uslubi yoki tarkibi mutlaqo o‘zgarishi mumkin. Bu o‘zgarishlar zamonaviylik tendensiyalari sifatida baholansada, har qanday zamonaviylik bilan an’anaviylik o‘rtasida uzviy, mustahkam aloqa mavjuddir. Axborot kommunikatsiyalari rivojlanib, hamma faoliyat raqamlashgan taqdirda ham kutubxonalar faoliyat ko‘rsatishda davom etadi, mutolaaning klassik namunasi saqlanib qoladi.

Bugun istalgan ma’lumotni internet orqali topishingiz mumkin. Biroq jahon axborot tarmog‘i ma’lumotlarining ishonchli ekani so‘roq ostida qoladi. Chunki internetda filtrlash, analiz-sintez funksiyalari yo‘qligi tufayli jamiyat kitoblarga va kutubxonaga har doim ehtiyoj sezadi.

Dunyoda bo‘lgani kabi yurtimizda ham o‘smirlarning kitobxonligi talab darajasida emasi. Oila, maktab va kutubxonalarda kitobxonlikka e’tibor susaydi. Keyingi yillardagi o‘zgarishlar sabab kitob mutolaasiga katta e’tibor qaratilishi natijasida holat ancha yaxshilandi. Birgina “Yosh kitobxon”, “Zukko kitobxon”, “Mutolaa”, “Yoshlar uchun ming kitob” kabi tanlov va loyihalar yoshlarning mutolaa madaniyatini yuksaltirdi.

Masalan, “Mutolaa” loyihasidan aniq maqsadlar ko‘zlangan. Jumladan, kitob o‘qish va uning targ‘ibotini zamonaviy texnologiyalardan foydalangan holda yangi bosqichga olib chiqish nazarda utuladi. Shuningdek, o‘zbek va jahon adabiyotining eng sara namunalarni jamlab, aholi, jumladan, yoshlar uchun elektron, audio va video variantlarda bepul foydalanish imkonini yaratish maqsad qilingan.

Ushbu loyihada Milliy kutubxona o‘zining to‘liq matnli axborot resurslari bilan ishtirok etmoqda. Bugungi kunda “Mutolaa” loyihasi doirasida 1100 dan ortiq kitob (badiiy asar, hikoya, ertak va ilmiy ommabop asar)ning audio va elektron variantlari tayyorlanib, mobil ilovaga joylashtirildi. Mazkur loyiha aholi, ayniqsa, yoshlar orasida ommalashib, mobil ilovadan faol foydalanilmoqda.

Yana bir tashabbus O‘zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligi hamda O‘zbekiston Milliy kutubxonasi hamkorligida tashkil etilgan “Non-Fiction” loyihasidir. U orqali jahon miqyosida kitobxonlar tomonidan yuqori baholangan ilmiy-ommabop asarlarni xalqimizga tanishtirish maqsad qilingan.

Bundan tashqari, tanqili yozuvchi va shoirlar, fan arboblari bilan turkum suhbatlar tashkil etilishi kitobxon millatni shakllantirishga xizmat qilmoqda. Lekin bu kitobxonlik hali yetarli darajada yuksalganini bildirmaydi. Bunda bolalarning nimani va qanday o‘qishiga e’tibor qaratish muhim hisoblanadi.

ELEKTRON
KITOBLAR SAVDOSI
KO‘PAYGAN

Kutubxonalar tizimini rivojlantirish, ular zamon talablariga javob beradigan bo‘lishi uchun bir qator ishlar rejalashtirilgan. Axborot-kutubxona sohasining asosiy jarayoni, jumladan, jamlash, kataloglashtirish, fondlarni saqlash, axborot texnologiyalarini qo‘llash, ma’lumotlar bazalari, uslubiy yordam, kadrlar malakasini oshirish sifatiga ham e’tibor qaratilmoqda. Shuningdek, bino va inshootlarni saqlash, texnologik park va litsenziyalı dasturiy ta’minotni yangilash, uzluksiz internetdan foydalanish, turli ijtimoiy-madaniy tadbirlarni tashkil qilish uchun mablag‘ ajratilmoqda.

2021-yildan buyon mamlakatimizda har yili aprel oyida “Kitobxonlik haftaligi” o‘tkazib kelinmoqda. Mazkur tadbirdan ko‘zlangan maqsad aholi, ayniqsa, yoshlar o‘rtasida kitob o‘qishni keng targ‘ib etish va kitobxonlik madaniyatini yuksaltirishdir.

Keyingi yillarda noshirlik sohasida faoliyat yuritayotgan tadbirkorlik subyektlari soni sezilarli darajada oshdi. 2024-yil 1-may holatiga ko‘ra, faoliyat yuritayotgan matbaa korxonalarining 271 tasi, ya’ni 14 foizi davlat ulushiga ega. Qolgan 1660 tasi, ya’ni 86 foizi xususiy sektorga tegishli. Nashriyotlar tomonidan o‘tgan yili 16 mingdan ortiq nomda jami 34 million nusxadan ziyod kitob chop etilgan.

Shu bilan birga, elektron kitoblar savdosi tobora o‘sib bormoqda. 2021-yilning birinchi yarmida sotilgan barcha kitoblarning 18 foizini elektron kitoblar tashkil qilgan bo‘lsa, bu ko‘rsatkich 2023-yilga kelib, 39 foizga yetdi.

Barcha sa’y-harakatlar kitob mutolaasini rivojlantirish hamda yoshlar ma’naviyatini yuksaltirish uchun qilinmoqda. Yaratilayotgan imkoniyatlardan to‘g‘ri foydalanish juda zarur. Zero, kitob o‘qigan inson jamiyatdagi jarayonlarga befarq bo‘lmaydi. Uning qalbidagi vijdoni, yuragida ori va o‘z ururi bo‘ladi.

Tobora virtualashayotgan davrda kitobxonlarni tarbiyalash kutubxona tizimidagi barcha mas’ullarning, ishchi-xodimlarning asosiy missiyalaridan biridir.



Milliy kontent

GLOBAL AXBOROT MAKONIDAGI ENG ZARUR EHTIYOJ



To‘g‘ri, haqqoniy va xolis axborotga ehtiyoj har doimgidan-da kuchayib bormoqda. Zero, mediamakoni o‘z manfaatiga xizmat qiladigan axborot bilan to‘yintirish orqali yoshlar ong-tafakkurini egallash holatlari kechmoqda. Bu esa hozirgi murakkab geosiyosiy jarayonda xolis, milliy manfaatlar himoyasiga qaratilgan kontent yaratishni kun tartibiga qo‘yadi.



Davlatimiz rahbari joriy yil 13-yanvar kuni Xavfsizlik kengashining kengaytirilgan yig‘ilishida milliy kontent yaratish, uni boyitish haqida mas’ullarga muhim vazifalarni belgilab bergan edi.

O‘zbekiston Jurnalistlar uyushmasi tashkil etgan “Eng yaxshi milliy kontent” respublika tanlovi mazkur vazifalar ijrosiga qaratilgani bilan ahamiyatli.

Milliy matbuot markazida ushbu tanlov g‘olibi va sovrindorlarini taqdirlash marosimi bo‘lib o‘tdi. Tadbirda so‘z olganlar milliy kontent yaratishning ahamiyati, uning muhim jihatlari haqida fikr yuritdi. Jumladan, mamlakatimiz axborot

makonini mukammal, ishonchli, puxta xabarlar bilan to‘ldirish, milliy kontentni muttasil boyitib borish haqida so‘z bordi. Bu boradagi ishlarni tobora takomillashtirish muhimligi ta’kidlanib, mazkur tanlovni tashkil etish va o‘tkazish jarayoni haqida qisqacha ma’lumot berildi.

Ma’lum qilinishicha, O‘zbekiston Jurnalistlar uyushmasi Oliy Majlis huzuridagi jamoat fondi tomonidan e’lon qilingan tanlovda ishtirok etib, “Aholi, ayniqsa, yosh avlodning ma’naviy-intellektual salohiyati, ongu tafakkuri va dunyoqarashini yuksaltirish, barkamol shaxsni tarbiyalashda kitobxonlik madaniyatini oshirish” loyihasi bo‘yicha g‘olib chiqqan.

Mazkur loyiha doirasida uyushma tomonidan qator ishlar qilinmoqda. Xususan, yosh toifasidan kelib chiqib, bolalar uchun 10 nomdagi kitob nashrga topshirilgan. Qolaversa, mazkur kitoblarning audio varianti tayyorlanmoqda. “Eng yaxshi milliy kontent” tanlovi ham ana shu loyiha doirasida o‘tkazildi.

Jurnalist va ijtimoiy tarmoq faollaridan ikki yo‘nalishda qabul qilingan ijodiy ishlar “Kitobxonlik targ‘ibotiga bag‘ishlangan eng yaxshi materiallar uchun”, “Yoshlar ma’naviyatini yuksaltirishga qaratilgan eng yaxshi materiallar uchun”, “Internet tarmog‘ida e’lon qilingan eng yaxshi milliy kontent uchun”,

“Dolzarb mavzulardagi eng yaxshi tanqidiy-tahliliy materiallar uchun” hamda “Bolalarni kitobxonlikka qiziqitirgan blog postlari uchun”, “Ijtimoiy tarmoqlarda yoshlar tarbiyasiga oid e’lon qilingan materiallar uchun”, “Milliy urf-odat va an’analarimiz aks etgan eng yaxshi materiallar uchun” va “Facebook” ijtimoiy tarmog‘ida milliy kontentni ko‘paytirishga qo‘shgan hisssasi uchun” nominatsiyalari bo‘yicha baholandi.

Tanlovga taqdim etilgan ijodiy ishlar shaklan va mazmunan rang-barang ekani e’tirof etildi. Ular milliy manfaatlarimizni ko‘zlagani, yurtimiz va dunyoda sodir bo‘layotgan voqea-hodisalarga xolis baho berishga qaratilgani bilan ahamiyatlidir. Bu esa o‘z-o‘zidan yangi O‘zbekiston ruhiga mos yangicha tafakkur tarzini shakllantirish, yoshlar o‘rtasida kitobxonlikni targ‘ib etish orqali ularning dunyoqarashini yuksaltirishga xizmat qiladi.

Milliy kontent global axborot makonidagi eng zarur ehtiyojdir. Uni har kuni, har birimiz yaratishimiz, xalqimiz manfaatlarini himoya qilish uchun targ‘ib etishimiz kerak. Shu ma’noda, milliy kontent ham vatan himoyasi kabi muhim vazifamizga aylansin. Bu esa ortga qaytmas tuz olgan keng ko‘lamdagi islohotlarni to‘la va o‘z vaqtida amalga oshirishimizda muhim qadamdir.

Zulxumor AKBAROVA,
jurnalist

“Yangi O‘zbekiston” va “Правда Востока” gazetaları tahririyati” DM

MUASSIS:
O‘zbekiston Respublikasi
Vazirlar Mahkamasi

Bosh muharrir:
Salim DONIYOROV

Tahririyatga kelgan qo‘lyozmalar taqriz qilinmaydi va muallifga qaytarilmaydi.
Gazetaning yetkazib berilishi uchun obunani rasmiylashtirgan tashkilot javobgar.
Gazeta tahririyat kompyuter markazida sahifalandi.
Gazetaning poligrafik jihatdan sifatlari chop etilishiga “Kolopak” MCHJ mas’ul.

O‘zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligi tomonidan 2020-yil 13-yanvarda 1047-raqam bilan ro‘yxatga olingan.
Nashr indeksi — 236. Buyurtma — 2574.
41369 nusxada bosildi.
Hajmi — 3 taboq. Ofset usulida bosilgan. **Qog‘oz bichimi** A2. Bahosi kelishilgan narxda.

“Kolopak” MCHJ bosmaxonasida chop etildi.
Bosmaxona manzili: O‘zbekiston, 100060.
Toshkent, Yangi shahar ko‘chasi, 1-A uy.
Bosmaxona telefoni: (78) 129-29-29

Navbatchi muharrir: Yunus Bo‘ronov
Musahhih: Nasiba Abdullayeva
Dizayner: Xurshid Abdullayev

Manzilimiz:
100060, Toshkent shahri,
Shahrisabz ko‘chasi, 85-uy